

湖山便覽

數

湖山便覽卷十一

仁和翟灝同緝

杭州王維翰玉堂重訂

江干路

錢塘江自城東北繞城而南候潮門正臨潮水之

衝門外爲捍海塘鐵幢浦貼沙河舊有疊雪樓上輓路東爲

廟子灣有昭貺廟舊有安濟亭北有映江樓西有觀潮

樓浙江亭舊有樟亭驛江樓映發亭草閣廣陵侯廟江面爲浙江渡

錢塘江江舊與湖水相通自漢築錢塘而江湖隔遂

各以錢塘名焉韋昭國語注以錢塘江及松江浦陽

江當禹貢之三江錢塘浦陽皆浙江隨地之異名也
一江而二之其說難盡信矣浙江始見于山海經源
出三天子都莊子謂之制河七發謂之曲江水經謂
之漸江虞喜云今錢塘江口浙山正居江中潮水投
山下折而曲一云江有反濤水勢折歸故云浙江盧
肇亦云浙者折也取其屈折而倒流也吳越春秋言
句踐歸至浙江之上望見大越山川重秀史記言秦
皇將游會稽至浙江不能渡道餘杭之西津浙名蓋
最古矣制河之制諸設反依字仍作浙北人名水皆

曰河河亦江也曲江義已備虞氏之說漸與浙或謂
其字形相近如邾鄒之變易而許慎說文浙水漸水
又復兩出程大昌言徽州婺州俱有浙溪二州之水
會子桐廬遂從杭越間入海則本其發源名自爲派
無嫌兩出也其水之不載禹貢則以其距海甚近無
事疏治非謂小而遺之也

任昉濟浙江
風江湖忽來往或與歸波
昧旦凌輕

送乍逐翻流上近岸無暇目遠峰更興想綠樹懸宿

根丹厓類久壤○孟浩然渡浙江問舟中人
潮落

江平未有風扁舟共濟與君同時時引領望天末何

處青山是越中○孫逖夜宿浙江扁舟夜入江潭

泊露白風高氣蕭索富春渚上潮未還天姥岑邊月
初落烟水茫茫多苦辛更聞江上越人吟洛陽城闕

何時見西北浮雲朝暝深○李觀憶錢塘江昔年
乘醉舉歸帆隱隱前山日半銜好是滿江涵反照水
仙齊着淡紅衫○李剛渡浙江理櫂適桐江隨潮
過漁浦山寒雪猶積江迴月初吐御氣凌烟霄乘槎
度星渚空濛老龍吟髣髴翠蛟舞境清人自愁夜靜
氣尤古獨坐不成眠霜晴聽津鼓○朱繼芳錢塘江
極浦無高樹蒼茫只遠空潮來江水黑日出海門
紅兩岸東西浙千帆來去風中原山色外殘夢逐歸
鴻○馬臻浙江晚眺昔年吳越事并吞留得青山
只斷魂落日正明漁浦渡歸鴉遙點范家村雲分雨
腳回沙激帆趁潮頭出海門欲問
淒涼千古意鷗夷何處有兒孫

江潮

水經注云錢唐縣東有定已諸山皆西臨浙江

水流兩山之間江川急迅兼濤水晝夜再來來則應
時刻以月晦及望尤大攷吳越春秋夫差內傳吳王

取子胥盛以鴟夷之器投之江中子胥因隨流揚波
依潮來往又越王外傳王葬大夫種于國之西山伍
子胥從海上穿山脅而持種去與之俱浮于海故前
潮水潘候者伍子胥也後重水者大夫種也其說頗
近荒誕王充論衡書虛篇駁之極辯大畧謂地有百
川猶人之有血脈其朝夕往來猶呼吸氣出入也言
子胥恚恨虛也嗣後論者多家言殊旨異葛洪以爲
天河激湧通經以爲地機翁張盧肇云日激水而潮
生封演云月周天而潮應僧隱之云挺空入漢山涌

而濤隨實叔蒙云析木大梁月行而水大山海逸經
謂海鮓出入之度浮屠書謂神龍變化所致燕肅折
衷羣說謂其隨日而應月依陰而附陽故進退盈縮
終無失期而浙江之口下有沙渾南北亘之月經乾
巽潮來已半濁浪推滯後水益來于是溢于沙渾激
而爲濤每仲秋旣望潮汎益羸雷擊霆砰有吞天沃
日之勢江干十餘里輿馬駢闐席幕充塞爭詫爲天
下詭觀姚合杭州觀潮樓有樟亭號濤來自古今
勢連滄海濶色比白雲深怒雪驅寒氣狂雷
散大音浪高風更起波急石難沈鳥懼多遙過龍驚
不敢吟劫如開玉穴危似走瓊岑但褫千人魄那知

伍相心岸催連古道洲漲踏叢林跳沫山皆溼當江
日半陰天然與禹鑿此埋向誰尋○徐疑杭州祝濤
頭不道沙隄盡猶欺石棧頑寄言飛白雪休去打
青山○徐積錢塘江潮獨派豈從天漢墜千濤爭
趁海波還齊聲怒過轟雷鼓亂沫噴來碎玉山塵土
刮開心目外冰霜留在骨毛間君看江上潮平後恰
似魚龍戰鬪閑○陳師道月下觀潮隔江燈火是
西興江水清平霧雨輕風過潮來雲四散水光月色
鬪分明○陸游觀潮送劉監至江上作江平無風
面如鏡日午樓船帆影正忽看千尺湧濤頭頗動老
子乘桴興濤頭洶洶雷山傾江流仍作鏡面平向來
壯觀雖一快不如帆映青山行嗟予往來不知數慣
見買符官發渡雲根小築幸可歸勿爲浮名老行路
○柳貫次韻魯參政觀潮怒濤卷雪過樟亭人立
西風酒旆青日殺行天淪左界地機激水出東溟倒
排山嶽窮千變闔闢雲雷竦百靈望海樓頭追勝賞
坐中賓客弁如星○王冕題趙千里夜潮圖去年
夜渡西陵關待渡兀立江上灘灘頭潮來倒雪屋海

面月出行金盤水花着人如撒霰過耳斜風快如箭
叫霜鴻雁零亂飛正是今年畫中見寒烟漠漠天冥
冥展玩陡覺心神清樓頭吹簫騎大鯨去看海上三
山青○葉顒浙江潮浙江潮從海門起濺沫飛流
幾千里老龍奮拔滄海波六丁怒決天河水萬馬奔
馳人盡驚千夫賈勇衆莫禦滔天濁浪排空來翻江
倒海山爲摧固知神物善幻善變化不然胡爲若此
之壯哉狂風湧洞響天籟長空隱約轟春雷衝堤激
岸勢雄偉春厓囓石聲喧逐更秦歷漢遞唐宋潮生
潮落來往幾時回上浮銀漢蕩瑤浦洶洶危瀾鋪練
組江神河伯盡出游素車白馬尤雄武海若載鸞旌
馮夷擊鼉鼓龜蛇跳躍長蛟舞人言子胥怒未消怒
氣突兀千霄霄吁烟吐霧如山高咆哮呼叱聲愈囂
震驚溟渤鳴次寥直添吳楚志氣驕於戲三綱五常
自古有至今禮法千載之下明如日月之昭昭君實
有臣而殺奚怨號員兮忠義非兒曹豈不知此無君
之罪將焉逃少焉風定洪濤靜似聞子言發
深省水天上下玉無瑕月白江空銀萬頃

候潮門

吳越城東四門曰竹車南土北土寶德宋城

東七門曰便門候潮保安新開崇新東青艮山其候潮卽竹車基也門外爲吳越射潮處宋時有花團窠團如意館白壁營雪醅庫櫓木橋夫差廟紅亭稅務市舶務護聖軍寨外沙巡檢修江司營諸蹟

捍海塘

卽江塘吳越備史云武肅王以開平四年八

月築捍海塘怒濤衝激版築不就表告于天禱胥山祠函詩一章置海門云傳語龍王并水府錢塘借與築錢城因採山陽之竹造矢三千隻羽以鴻鸞之羽

飾以丹雘鍊罡火之鐵爲鏃募強弩五百人以射濤
頭人用六矢每潮一至射一矢五矢潮乃退臨安志
云江挾海潮爲患其來已久白樂天判郡日嘗爲文
禱于江神然人力未及施也錢武肅始築捍海塘在
今候潮通江門外王命強弩射潮潮避錢塘擊西陵
遂造竹絡積巨石植以大木隄岸旣成久之乃爲城
邑部落凡今平陸皆昔時江也大中祥符間潮激西
北岸稍逼州城發運使李溥用錢氏舊法倚疊成岸
七里景祐中復壞轉運使張夏改作石隄十二里且

秦置捍江兵士專一採石修塘隨損隨補慶歷初再
壞郡守楊偕等協力修築有丁寶臣記自南宋訖明
屢壞屢築國朝以來尤致意焉

鐵幢浦

吳越備史云王射潮箭所止處嘗立鐵幢因

名其浦夢梁錄云錢王築塘時高下置鐵幢凡三以
鎮壓潮水退則見其幢也淳祐戊申帥司買地置亭
其上元楊維禎有鐵箭賦序云箭在杭城外南新橋
北鏃首出土人撼之可動不可拔也父老云掘土深
則箭隨土陷培以土則隨土以高此其神異也所謂

鐵箭實卽幢耳明徐一夔辨云幢制首圓如杵徑七
八寸出土三尺餘故老言初置幢時塘猶未成慮潮
衝盪用鐵輪護幢趾鐵絙貫幢幹且維絙石礎然後
實土築塘故其首出土幢本有三一在舊便門東南
小巷今巷尙名鐵箭一在舊薦橋門外皆堙塞僅存
在利津橋者近指此幢爲箭幢前爲鏃鏐雖英武其
射潮僅一時精誠所激豈有異于常箭哉王安石鐵
幢浦憶

昨初爲海上行日斜來往看潮生如今身是西歸客
回首山川覺有情○劉基錢王簡頭歌 鴟夷遺魄
掬餘怒欲取吳山入江去雷霆劈地水羣飛海門扶
胥沒氛霧英雄一怒天可回肯使赤子隨鯨鮪指揮

五丁發神弩鬼物辟易腥風開三百年來人事改濤
落沙平箭空在石梁飲羽未足誇蜀國三犀謾欺給
近聞黃河水亂流青徐一半悲魚頭
安得壯士斡地軸爲拯斯民塗炭憂

疊雪樓

成化杭州府志云武肅王于疊雪樓架强弩

數百以射潮

上輓路

游覽志云朱家橋通上輓路宋時園邱大路

御輦所經也攷朱家橋卽南新橋臨安志南新橋與

上泥橋下泥橋渾水清水二閘橋竝載宋園邱在嘉

會門西此在門東御輦不應經此輓字只當作泥

貼沙河

新唐書地理志云錢塘縣南五里有沙河塘

咸通二年刺史崔彥曾開蘇詩注云聞昔潮水衝擊
奔逸入城故開沙河以決之河有三曰外沙中沙裏
沙臨安志云貼沙河一名裏沙河南自浙江跨浦橋
北經渾水閘清水閘羅木橋朱家橋轉西由保安閘
至保安水門入城其外沙河自舊竹車門過紅亭稅
務沿城至艮山門入于運河游覽志云宋時沙河居
民甚稠碧瓦紅簷歌吹不絕故蘇詩有燈火沙河夜
夜春句

蘇軾戲贈

惆悵沙河十里春一番花老一

番新小樓依舊斜陽裏不見樓中垂手人○

陳淵初到臨安

風際管弦朝病酒雲中樓閣

夜焚香十年一夢

沙河路獨步春泥覺燕忙

廟子灣

在便門外渾水閘東有平濟廟宋乾道初周

淙修江岸建又有英顯通應公廟寶祐初建

郭祥正廟灣夜

泊薄昏洲渚鷗鳥靜照網漁家燈火紅盡道龍歸井水濁明明願借一帆風

昭貺廟

在渾水閘東四朝聞見錄云景祐中張公夏

以工部郎出爲兩浙轉運使杭州江隄率用薪土潮

水衝擊不過三歲輒壞夏令作石隄十二里民感其

功德慶歷中廟于隄上政和二年封寧江候尋改封

安濟公并賜廟額今俗稱張司封廟

王安石張工部使節紛紛

下禁中幾人曾到此城東獨君遺像今如在廟食真須德與功

安濟亭

熙寧六年蘇長公任杭州通判八月十五日

觀潮作詩五首寫在安濟亭上見烏臺詩案據張夏

封號爲安濟公疑其亭與廟近

蘇舜欽宿錢塘安濟亭觀潮支肘聽潮

聲喧歷久未停隨風過漁浦伴月出滄溟鱗穴復時

滿胥神果有靈連天卷雲霧徹曉下雷霆拾撒游心

映江樓

游覽志云在永昌門外宋時有亭扁曰煙雲

魚鳥元至正十年重建扁曰瞰江明正德元年改層

樓扁曰映江尙書屠滹爲記時又有所謂澄江樓者

未詳定所附見于此

李贊皇映江樓形勝東南屬此樓薇垣公暇喜重游座中山